

FLASHAK

PASAI SAN PEDROko Libia traineruak irabazi zuen Kontxako Bandera bigarren ihardunaldian izugarrizko estropada egin ondoren. Sanpedrotarrak ez zuten beste hiru traineruak atzean uzteko arazorik izan. Arraun Lagunak sailkatu zen Libiaren atzetik bigarren ihardunaldi honetan.

URIARTE-Zulaika II bikoteak eskuratu zuen Plentziako Zesta Torneo, finalean Txikito de Bolibar eta Zabaleta menperatu ondoren. Uriartek bikain jokatu zuen eta egun dagoen jokalaririk onenetarikoa dela erakutsi zuen. Txikito de Bolibarrek aldiz ez zen espero bezain ondo ibili.

EUGI-ARRETXEk jipoi handia eman zioten Bengoetxea IV eta Errandoneari (22-5) Cenicero pilotalekuan. Patxi Eugik ederki jokatu zuen eta ez zuen Arretxeren laguntzarik behar izan partiduan nagusi izateko. Errandoneak partidua eskasa egin zuen.

NIGEL MANSELL britainiarrek irabazi zuen Italiako F-1 Sari Nagusia, Ayrton Sennaren aurretik. Garaipen honen ondoren, Senna agertzen da sailkapeneko orokorreko lehen postuan 77 punturekin eta Nigel Mansell bigarren postuan 59 punturekin.

WAYNE RAINEY estatubatuarra eta Luca Cadalora italiarra dira aurtengo motoziklismo mundialeko txapeldunak, 500 z.k. eta 250 z.k.etan. Kevin Schwantz estatubatuarra eta Helmut Bradl alemaniarra izan ziren Le Mansen korritutako probako irabazleak.


MAURICIO FONDRIEST italiarrak eskuratu zuen lidergoa Volta a Catalunya, igandean korritutako bi sektoreak irabazi ondoren. Sailkapen orokorrean, Panasonic taldeko txirrindulariak segundu bateko aldea ateratzen dio bigarren sailkatuari, Rudy Dhaenens holandarra.

ONE TO TWO zaldiak irabazi zuen Donostia Saria egun dagoen zaldirik azkarrena dela erakutsiz. El Ventorillo zalditegikoak izugarrizko karrera egin zuen hipodromo-ko zaldirik onenen aurka eta ez zuen saria eskuratzeko arazo handirik izan.

MACCABI TEL AVIV taldeak eskuratu zuen Hector Quiroga Torneo garaipena, finalean Montigala Joventut gaingitu ondoren. Israeleko jokalaria ziren torneo irabazteko aukera gutxien zutenak, baina seriotasun handiz jokatu zuten, talde sendoa dela erakutsiz.

MERLENE OTTEY jamaicarrak lasterketa bikaina egin zuen Coloniako mitinean eta erraz nagusitu zen 200 metroko proban. Katrin Krabbe alemaniarrek, berriz, bigarren postua besterik ez zuen lortu 100 metroko proban, Gwen Torrance estatubatuarrek menperatu bait zuen.

ARRAUNA



San Pedrok aro handi bati bukaera eman diezaioke garaipen honekin.

San Pedroren garaipenak aro berriari eman dio hasiera

Arraun Lagunak taldeak baikortasunez begiratzen die datozen urteei

San Pedroko Libia untziak ezustean lortutako garaipenak «amaiera» eman dio traineru denboraldiari. Getaria-Donostia, El Corte Ingles... estropadek ez dute lau handien arteko norgehiagoka ikusteko aukera izango. Arraun Lagunak eta San Juan trainerua zintzilikatzeko zorian daude.

DONOSTIA

Kontxako estropadaren ostean, era guztietako iritziak entzun zitezkeen Donostiako kaian. Aditu eta arraunlari gehienek Kontxan amaitzen dute denboraldia, nahiz eta

oraindik Nerbioi, El Corte Ingles eta Getaria-Donostia estropadak jokatzeke dauden.

Talde gehienek ordea etorkizunari begiratzen diote. Guztiek 1992. urteko Kontxa dute buruan jadanik. Aurten lehen postuetan aritu diren San Pedro, Orio, Arraun Lagunak eta San Juanek etorkizun ezberdina dute. Pasaitarren kasuan, 80ko hamarkadaren erdialdean hasi zuten nagusitasuna hautsi zorian daude. San Pedro eta San Juanek «bloke» bera mantendu dute azken urteotan, baina badirudi atzetik datozen gazteak gogor jotzen dutela. Kalparra eta Yolako arraunlariek protagonismo berezia har dezakete datozen urteotan.

Orioko traineruaren etorkizuna «ziurtatuta» dago. Jose Luis Korta-

ren zuzendaritzapean jarraituko dute agilutxoek, eta zenbait baja izango dituzten arren, batez ere arraunlari «beteranoen» aldetik, aurten egin duten lan bikainari segida eman nahi diote.

ARRAUNEK
TALDE
GAZTEA

Guztien artean Donostiako Arraun Lagunak da arraunlaririk gazteenak dituen taldea. Josean Jauregi eta Benito Elizalde entrenatzaile-arraunlari «beteranoen» inguruan bildu dituzte Arraun Lagunakekoek Donostiako talde ezberdinetatik etorritako arraunlari onenak.

Arraun Lagunakeko arraunlariek baikortasunez begiratzen diote datorren denboraldiari. Aurten jadanik trainerua zintzilikatu dute.

GOLFA

Olazabal Europako taldean Ryder Cup txapelketarako

DONOSTIA

Txema Olazabal hondarribitarrak Ryder Cup txapelketa jokatuko du hilaren 27tik 29ra bitartean, Bernard Gallagher Europako taldeko kapitainak hamabi gizoneko zerrendan sartu ondoren. Bederatzi jokalarik zuten Estatu Batuetako taldearen aurkako txapelketa honetan jokatuko txartela, denboraldian lortutako emaitzen ondorioz.

Eskoziarrak Nick Faldo eta Mark James britainiarrak eta Txema Olazabal hondarribitarra aukeratu ditu Kiawaw Islanden estatubatuarren aurka jokatuko. Nick Faldo inglesa, 1990eko jokalaririk onena, da aurreko sei aldietan Europako taldearekin jokatu duen bakarra. Olazabali dagokionez, joko bikaina erakutsi zuen 1989an eta aurtengo denboraldian espero bezain emaitza onik egin ez badu ere, Europako jokalaririk onenekin batera aritzeko aukera izango du.

Severiano Ballesteros, Collin Montgomerie, Steven Richardson, Ian Woosnam, Paul Broadhurst, Bernhard Langer, David Feherty, D. Gilford eta Sam Torrance izango dira Europa ordezkatzeko duten gainontzeko bederatzi jokalaria.

EUROPAKO
JOKALARIAK
GAZTEENAK

Europako ordezkariak izango dira txapelketa honetan parte hartuko dutenen artean gazteenak. Europako jokalariek 373 urte dituzte guztien artean, Estatu Batuetarrek baino 58 urte gutxiago, hain zuzen ere. Steven Richardson eta Txema Olazabal 25 urterekin, dira jokalaririk gazteenak. Sam Torrance (38) eta Mark James (37) dira Europako taldeko jokalaririk beteranoenak.

Estatubatuarrei dagokionez, hamabi gizonek pasatzen dituzte 30 urteak eta horietatik hiru gizonek 40tik gora dituzte. Payne Stewart, Fred Couples, Hale Irwin, Lanny Wadkins, Paul Azinger, Wayne J. Levi, Mark O'Mara, Mark Calcavecchia, Corey Pavin, Steve Pate, Ray Floyd eta Chip Beck dira Estatu Batuetako taldea osatzen duten hamabi gizonak.

MOTOZIKLISMOA

Herri Torrontegik Suzuki taldearekin korrituko du

LE MANS

Herri Torrontegi bizkaitarrak Suzuki moto ofiziala izango du datorren urtean 250 z.k.etan. Gorlizeko pilotuak San Marinoko Sari Nagusian probatu zuen Lukcy Strike taldearen Suzuki RGV motoa, eta emaitza bikaina izan zen. Lukcy Strike taldeko zuzendariak Le Manseko zirkuitoan erantzutekotan geratu ziren, eta badirudi erantzuna baiezkotzea izan dela.

Torrontegi berak oraindik ez du

adierazpenik egin. Dena den Le Mansen ga uzak guztiz argitu dira, eta sinadura besterik ez da falta. Azken orduan ezusterik gertatzen ez baldin bada, Torrontegik Zeelenberg holandarrarekin Lukcy Strike taldean korrituko du.

Le Manseko Sarian Gorlizekoak Aprilia motoarekin korritu zuen, baina Saria bukatzeko zortzi itzuli falta zirenean proba utzi behar izan zuen. Suzuki taldearekin orainarte eduki ez duen estabilitatea lordezake Herrik.



Suzukiren eskutik Torrontegi garaipenetara itzul daiteke. RAMON BASALDU